

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

NOVEMA 2020

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

NOVEMA - MASINA O FAIGA TAULAGA



Tuiloma Leleua F. Gae'e AF(Taitaifono K.Tupe), Hon. LeMamea Tuiletufuga Ropati AF(Taitaifono Faamavae)
Tavita Anesone FT(Toeaina Penisione), Keneti Leaupepetele FS,(Failautusi Komiti Tupe)

AUĒ! UA MALIU LE TOA.

FEAGAIGA EFKS TIMARU



Siaosi Leleimalefaga FS



Oteta & Fuiui Taule'alo FS

FAASINO UPU

1. O le Lauga	2
2. Osiga Feagaiga EFKS Timaru	4
3. Tatala Feagaiga EFKS Papa Puleia	4
4. Umusaga Maota EFKS Fasitootai	5
5. Ua Maliu Le Toa (Siaosi Leleimalefaga)	6
6. Tatala Feagaiga EFKS Saleilua	7
7. Fetuutuunai Muniao	7
8. Tatou Mea'ai Tatau ma le Aso	8
9. O e ua Fai i Lagi le Folauga	11-16

O LE LAUGA

Tusi Faitau: Ieremia 32:1-15

Matua: “*Se'i e faatau lo'u fanua, o lo o i Anatota o i le nu'u o Peniamina;.. Ona ou iloa ai lea, o le afioga a le Alii lea.*”

Manatu Autu: **Tupe i le mea o i ai au upu**

O le faatuatua e leai ni galuega, o se faatuatua mate (Paulo). O upu foi e fa'alele ae leai so latou faatinoga, ua lē 'ese a ma se atigi pūpū e feta'avalea'i solo (se'i tulou). O lona uiga, po o a tala mālie ma upu susua, o se lauga foi e tamāoiga i le sosia o le gagana, ae leai so latou tino mai, ua na o se lu'uga o efuefu o le palapala e lelea mamao ese atu pe a viligia i le savili. E iso foi i le tau su'ea o le pāsina, ma soona sa'ena ai fua le atoseu o seuga, ae afai e lē o i ai le pa i le ato fagota, na ona momo'o a e tuli le mafua, a o le igafo lava e toe māgoto ifo i le suātai.

O le ola saisaitia ma le taotaomia o manatu ma lagona o le perofeta ona o tu'uaiga i le faatinoina o lona valaauna, o se tui tīgā ogaoga mo le fa'ataunu'uina o ana feau. E lē taugamālie foi i le mafaufau, le alafa'i mai i tauemuga ma le upu faifai. E āu lava foi ina gase atu le aso, a'o fetina'iina pea lagona i le tau faamata'u mai ma le upu taufa'aleaga. Talofa e, e ala mai i loimata, e moe i tīgā, auā ua mamafa le tā. Leitioa foi a fa'alupe, o le perofeta o loimata, leaga e matuitui faigata e feagai ma le faailoa atu o le finagalo o le Atua.

O mafatiaga o sauaga i le tino, e lē faatusaina i a'afiaga o le mafaufau. Peitai, poo fea lava, e lē tatau ona mate le fa'amoemoe ua maua'a i le fa'amaoni o le alofa tulituliloa o le Atua. O le faamoemoe mautinoa lenā, e le'i taumatea ai le nofo sauni o Ieremia e faatino lona valaauna, e tusa ma le faatonu mai o le Atua. E le'i afaina i le perofeta po o fea; po o afea; a'o ā foi ni pefea e fetuleni ane, e ui i lona faanofoesea i le falepuipui.

O lenei vaitau, o loo matuā tapu lava ni asiga mo i latou o faanofoesea ona o le Koviti 19, peitai sa tatala lava avanoa e asiasi ane ai aiga ma uo a le perofeta ao faanofoesea i le falepuipui, i le maota o le tupu. A o le avanoa lea na feiloai ane ai i le perofeta lona tausoga, o Hanameali lona igoa. O se feiloaiga na fa'aali ane ai foi ma le mana'o o Hanameali ina ia faatauina e Ieremia lona fanua o loo i Anatota. Ai lava na iloa e Hanameali e tele ni tupe a Ieremia. A le o lena fo'i, masalo o le atuatuvalae ma le lē mautonu o le uso, pe tua i ni a le umia saoloto o fanua, auā ua i le lima malosi o Nepukanesa ma Papelonia le pule i mea uma.

Peitai i le manatu o Ieremia, o le mea mai le Atua lenei mea. Auā o le afioga lea a le Atua na oo ane ia te ia, ina ia faatauina le fanua. Ae lē ma'i foi Ieremia ia. Auā o le fefaatauaiga ua faia nei, ua le na o na tuuina atu o le tau o le fanua, ma se feagaiga o upu ma tala e pei ona iloa i masaniga ma faa-le-aiga, ao le feagaiga ua faamaufaailogaina.

O loo faamatalaina i fuaiupu e 10-15 le faamaufaailogaina o le faatauga o le fanua ua faatauina e Ieremia. Le feagaiga ia tusa ma le tulafono o le faatauina o fanua. Ae sili ai, o le taumulimuli e tusa o le faatonu mai o le Atua. Ua manino lava, o le faatauina o le fanua, o le mea mai le Atua. O le faatauina o le fanua, o le faamoemoe ia aliali le faamaoni i folafolaga, ma ia tino mai folafolaga. O le faatauina o le fanua o le faailoga o le tagata atoa i le tino, mafaufau, ma le agaga, ia ofoina atoa ina ia tino folafolaga. O le fesili, o ā ia folafolaga? O le Atua lava ia o le Atua fai folafolaga.

^{“¹⁸}Faauta, ou te toe faafoisia mai le tafeaga o fale ie o Iakopo, ma ou alofa atu i ana mea e nofo ai... ”Iere.30.

^{“⁴}Le taupou o Isaraelu e, ou te toe ati a’e ia te oe, ona atiina a’e ai lea o oe... ”Iere.31.

^{“³¹}Faauta, e oo i ona aso ou te osia ai le feagaiga fou ma le aiga o Isaraelu, ma le aiga o Iuta.”Iere.31.

^{“¹⁵}Auā o loo faapea ona fetalai mai o le Alii o ‘au, le Atua o Isaraelu, E toe faatauina i le nuu nei o fale, ma fanua, ma tovine.”Iere.32.

O le Atua folafola lenā, na faagaganaina ai Ieremia le perofeta, e ta’u atu i tagata e tuu avanoa le Atua. E taumulimuli pea le alofa o le Atua, seia oo ina tuua e le tagata ona ala leaga, ae liliu mai e ola i le alofa o le Atua. E lē afaina po o le ā le taimi, o fea foi le tafa o le olaga o loo tatou i ai, po o le taulotoaiga o faigata o le ola valaaufina, e fa’aaogaina pea i tatou e le Atua i ala ua la saunia, ina ia taunu Lona finagalo. O le ā so tatou malosi, o taleni ma agavaa, o le poto ma le mafaufau, o tupe ma tamaoaiga, ua finagalo le Atua ia saosao laumea ia mea uma e poupou ai Lona finagalo paia, ina ia tino Lana faaolataga mo tagata.

Ua tatou i ai i le ifo ai o feau o lenei tausaga. Le anoanoa’i o lafoga faalele ma folafolaga o lenei tausaga sa folasia mo lou toalua ma lau fanau. Lou auaiga ma le tautua, lau aulotu. Sa faapē’ī ona e galue i nei folafolaga? Le tapisa ma le leotele o leo faapolokiki ao aga atu i le iuga o lenei foi nofoaiga. Oka se mau folafolaga. A o ā mai nisi o folafolaga o lenei 5 tausaga a tali mavae. O faapefea ona tauave ma faatino nei folafolaga? O faia ea ma le alofa mo tagata uma pe na o i latou o ē usiusitai i lau poloaiga? Talofa e! E i ai mea tāua o le olaga mo aso uma e tatau ona faatino mo tagata uma, a ia lē avea o se au’upega mo le polokiki. Faafetai i le folafola mai o mea lelei, ae aiseā ua nanā ai mea ua lē lelei. E mautinoa foi o i ai nisi folafolaga o taofiofi. Aiseā? Se’i pale mai ona fa’ailoa atu lea. O le mea lenā e ta’u o le folafola taulamalama. O le ā se leo

faaperofeta o le ekalesia i nei mea? O loo iinā le silafia, ae fai mai le perofeta o Mika, “⁸Sole ua fa’āali atu e Ia ia te oe le mea lelei, pe a lē o ia mea ia fai le amiotonu, ia naunau i le alofa, ma ia feoa’i ma lou Atua ma le loto faamaulalo.”Mika 6.

O au’upega nā e tū poupou ai soo se pulega, ma soo se faiga malo. A o ā mai oe le Ekalesia i le faatinoga o au folafolaga? O lenei lava masina, o le vaitau o faiga taulaga. “Fai sau taulaga. Ia lelei sa’u taulaga. Ia mū la tatou taulaga.” O la tatou feau tauave lea ma le upu folafola o lenei vaitau o faigataulaga. Fai taulaga e lelei, faitaulaga e manogi i fofoga o le Alii. Tautuana! Ia lē na ona folafola, a ia fai se tino o le upu. Fai mai le feau o lenei lauga “Tupe i le mea o i ai au upu” (Put your money where your mouth is). Ta’u atu i tagata le moni o lo tatou faatuatua e ola i faatinoga, ae lē na o upu. Fai le mea sili mo le faiga taulaga i lenei tausaga. Ave uma i le Atua, na te toe faatele mai ai mo tatou. O lā le apostolo o Paulo i le ekalesia i Roma, “¹Ia outou tuuina atu outou tino i le Atua, o le taulaga ola, ma le paia ma le mālie.”Roma 12.

O le Atua lava ia e ala ia Iesu Keriso o le atoatoa lea o le faatinoga o folafolaga na faia e le Atua mo le faaolataga o le lalolagi. O loo tatou faatali nei i lenā masina fou e faamanatu Lona soifua mai e ala i le Pepe o le Kerisimasi. O la lava lea na fai mai ai Ioane, “¹⁶Auā ua faapea lava ona alofa mai o le Atua i le lalolagi, ua ia aumai ai lona Atalii e toatasī, ina ia lē fano se tasi e faatuatua ia te Ia, a ia maua e ia le ola faavavau.”Ioa.3.

O Lona maliu ma Lona toe soifua manumālō mai le oti, o faamanuiaga mautinoa ia i le ola e faavavau, mo le tagata faatuatua ma alofa faamaoni i le Atua.

Ia manuia tele le ekalesia EFKS i ana feau faai’u o lenei tausaga 2020. Ia manuia Samoa le atunu. Ona o Iesu le Alii Faaola e toatasī. Amene.

Saunia: Letone Uili FS, EFKS Poutasi.

FALEALILI SAFATA SIUMU

OSIGA FEAGAIGA EFKS TIMARU, NIUSILA.

“O le galuega a le Atua e amo faatasi; o le faifeau ma le aulotu faatasi ma le Atua”. O le feau faa-le-agaga lea sa fai ma autū o le Osiga Feagaiga a le EFKS Timaru (Pulega Motu i Saute, Matagaluega NIU SILA SAUTE) ma lo latou feagaiga taulagi, susuga Oteta Taulealo FS ma le faletua ia Fufui, Aso Toonai 31 Oketopa 2020. Sa faia lenei sauniga i le falesa o le Eklesia Metotisi Papalagi o loo faia ai a latou sauniga lotu. O le Susuga i le Toeina ia Tumama Vili FT (KMTA NSS) sa ia taita’iina le Sauniga. O le susuga Peniamina Faalave FS (Blenheim) na fatauina le Tusi Paia, Uosepi Paiaaua FS (Faamisionare Ashburton) sa taitaiina Tatalo, Rupi Leota FS (Shirley) sa faia le Lauga, Tatalo Faamanuia o Faleulu Malaulau FS (Nelson), ma le Sauniga o le Faamanatuga na ta’ita’i e Oteta Taulealo FS ae tautuina e Viliamu Chan Foung FS (Wainoni) ma Lole Fiso FS (Invergargill).

Sa faatumulia le maota tapuai i le paia o le eklesia, o aiga na lua, le mammal o le Pulega faapea le aufaigaluega ma le nuu sa auai i lenei faamoemoe ttau. Ina ua mae’ a le sauniga ona mapu ane lea i le maota o le galuega mo le taumafataga ma fa’aloaloga masani o aso faapenei.

O le susuga Oteta e mai le afioaga o Samatau, o le faletua ia Fufui e mai Savaia Lefaga; sa galulue muamua i la’ua i le EFKS Sili, Pulega Palauli, Matagaluega Faasaleleaga. Sa malaga mai i Niu Sila ia Iuni 2017 ma galulue ai loa faa-misionare i le EFKS Timaru. Sa fuafuaina le osiga feagaiga mo Setema peitai ona o le tulaga o le faama’i Koviti-19, o le mafuaga lea na toe tuu mai ai i le masina o Oketopa. Peitai e ui lava i lenei tulaga lē maalofia, e le’i solomuli ai le agaga o le titi faitama pe a valaauina e le Atua mo Lana galuega paia.

O lea e fai ai le faatauvaa, ma fofoga o matua o le Pulega ma le Matagaluega, e momoli atu ai sa matou faafetai tele i lau susuga i le faafeagaiga ma le faletua, le paia o le Eklesia Timaru faapea aiga na lua mo la outou fa’aloalo maualuga ma pelega o lea aso. Ia Viiia le Atua i mea uma.

Fitifiti Luatua FS, Failautusi Pulega Motu i Saute, NIU SILA SAUTE.

TATALA FEAGAIGA EFKS PAPA, PULEIA.

O le susuga Leaso Tupa’i FT, le toeina o le Pulega Palauli, o le KMTA Matagaluega Faasaleleaga, na ia ta’ita’i le sauniga o le Talagā Feagaiga a le EFKS Papa Puleia ma lo latou faifeau, susuga Faamanuia Fa’aliga FS ma lona faletua o Talifasia. O le Aso Faraile 29 Oketopa na faataunu ai lea faamoemoe sa auai uma ai le aufaigaluega o le Pulega ma nisi o le Matagaluega. Ua faia lea tulaga ona ua faataotolia le faifeau i le gasegase tigaina, o uaga e aofia ai lona lē mafai ona tautala mai, ua faigata ona tali lana taumafataga, ua na tau lē iloa foi tagata. Sa tele aso o aumau i lona aiga i Utualii ma tau saili ai se togafiti; ae na mafai ona auai atu o ia i le faatinoga o le tatalaina o la latou feagaiga i lea aso. Sa faamafanafana le susuga Toeina ia Tupa’i ma faalototele i le faafeagaiga ma le faletua, sa faafetaia foi lo la’ua sao ma le auaunaga i le Atua i totonu o le EFKS Papa, le Pulega ma le Matagaluega faapea le Eklesia Aoao. Faafetai mo lenei 27 tausaga o latou galulue faatasi talu le tausaga 1993 na amata ai la la’ua galuega. O le susuga Faamanuia ua 68 tausaga lona soifua – sa agavaa e penisione i le tausaga 1997 ina ua 65 tausaga, peita’i sa auauna pea mo lona Alii ma le Tala Lelei ma le faamoemoe seja aulia lona 70 tausaga i le 2022 ona penisione aloaia lea, pe a tusa ma le finagalo o le Atua. Talofa ua lē o gatasi le futia ma le umele, i se mana’o o le auauna ma le pule faasoifua a le Matai e ana le galuega. Sa fa’aalialia pelega o mafutaga e le toeina ma le aufaigaluega i faifeau ma faletua, i o latou alofaaga mo le susuga Faamanuia ma Talifasia, ina ua maamaau le Pulega Palauli e \$20,000, o le Matagaluega Faasaleleaga \$20,000, ma le Mafutaga Tina Pulega Palauli \$20,000; e lē aofia ai mo’omo’oga alofa o le EFKS Papa Puleia ma itutino eseese o le lafu mamoe sa ta’ita’iina, fafaga ma tausia e le leoleo mamoe faifeau ma lona faletua. Ua tuuina atu le tausiga o le galuega i Papa Puleia i le susuga ia Faisiota Autagavaia AM, o loo galue faa-faia’oga i le Kolisi Tuasivi. Ia alofa le Atua faamanuia le tuumuli atu o le susuga faafeagaiga ma le faletua mo se sailiga togafiti, faapea foi le galuega fa’auau a le EFKS Papa Puleia. Ia viia le suafa o le Atua i lo la’ua soifua ofoina atu mo Lana galuega.

Niulala Kupa FS. Failautusi Pulega Palauli, FAASALELEAGA.

FAAPA'IA FALE FAIFE'AU

EFKS FASITO'OTAI

“²⁷E lē sao atu lava i ai se mea leaga e tasi, po o sē na te faia se mea inosia, po o se pepelo; na o i latou lava e ua tusia i le tusi o le ola a le Tama i Mamoe.” Fa’aa.21.

O le Aso Faraile 30 Oketopa 2020 na faapaia ai le galuega o le maota o le faafeagaiga susuga Eric Mulitalo FS ma le faletua o Amata, o le EFKS Fasitootai, auā le afio o le Aiga Taulagi, le Maopu o le Tuiaana, le matua o Usoalii ma le mamalu i le Falefitu. O le Toeaina o le Pulega Alofi, susuga Ailepata Leuta FT (KMTAAana), na ia ta’ita’i le sauniga, faitau le Tusi Paia, tatalo ma fai le lauga. Sa auai le afioga Taitaifono Fono Tele ma le faletua, Toeaina ma Faletua o le Matagaluega Aana, le afioga i le Masiofo a le Ao mamalu o le malo, Faamausili Leinafo Tuimalealiifano, o faifeau ma faletua o le Pulega Alofi, ma le mamalu faalemalu i le afioga Minisita, Hon. Afamasaga Rico Tupa’i, o aiga ma uo i le galuega, ae maise le mamalu o le afioaga.

“O le tagata ese foi, e le so lou nuu o Isaraelu, a ua sau o ia mai le nuu mamao ona o lou suafa..ma tatalo i lenei fale”. O le faatomuaga lea o le saunoaga a le susuga i le faafeagaiga taulagi i le Tala o le Galuega. Na fuafua mai i le 2017 ina ua mae’ a nisi o galuega tetele sa feagai ma le Aulotu, ma le faamoemoe e amata i le 2019 i le maota o le galuega (hall) le Taeaonalua, ona ua lē saogalemū ma lē ofi. Peitai ona o mafuaaga lē ma’alofia, na faato’ā faatino ai ia Me 2020, e amata i le Maota o le Faifeau. E 5 Konekarate na saili ai se kamuta ma filifilia ai le Gold Builders, taitaiina e le afioga Etefano Efeso Leituala i le tau e \$481,000 e aofia uma ai le fale ma meafale, suaina o le eleele ma le tuuina i lalo o le maota tuai. O le aso 16 Me 2020 na sainia ai le feagaiga ma tauaao atu ai le 50% o le tau o le galuega; aso 31 Me le sauniga lotu faamavae ai i le maota tuai, aso 3 Iuni na tuu ai i lalo, a o le aso 11 Iuni na faapaia ai le fanua mo le galuega ua fuafua mo le 20 vaiaso. O sailiga seleni eseese a le Ekalesia, faatasi ma fesoasoani mai o aiga ma lupe faalele o tama fanau i Samoa ma nuu mamao. E 28 sui o le Autalavou o loo galulue i galuega faavaitaimi i Niu Sila ma Ausetalia o maua mai ai fesoasoani tupe. Sa saili se nogatupe i le NPF ona e 2 galuega tetele a le Ekalesia (Maota Faifeau & Maota o le Galuega/Hall). O le tupe mai le mafutaga alo ma fanau i Ausetalia e Aus\$10,000 (ST\$17,5000). O loo fai le Lūlū a le

Ekalesia fuafua e se’i ia Iulai 2021. Na toe fai nisi suiga ma faaopoopoga (variations) o le tau ina ua faaopoopo i ai le pākaga, le auala taavale i totonusi o le fanua, le togālaau ma isi e \$37,406.85, ma maua ai le aofaiga atoa o le tau o le galuega e \$518,406.85. Na ia faafetaia le afioga i le Matua o Faiva ma le Falefa o le Aiga Salemalama, o la’ua matua faaleagaga – Iosefa & Tina Afutiti FS (EFKS Peteleema fou), Feterika & Navy Motu FS (EFKS Lano); o lupe faalele a le Ekalesia (Alesana & Siapolima Afamasaga (Lefagaolii), o uo ma paaga, alo ma fanau a le Ekalesia, aiga o le faifeau ma lona faletua, le afioga i le Minisita, ma le toatele o i latou sa velo se ‘aso ma lafo se ma’ā, tainane o le tatalo ma taputapua’i, auā e lē sili le ta’i nai lo lea. Na taualuga le saunoaga a le susuga faafeagaiga i le upu a Tavita, *“¹⁴A o ai ea a’u nei? O ai ea foi lo’u nuu, ina ua matou mafaia ona fai taulaga ma le loto faapenei? Auā mai ia te oe mea uma lava; o au mea foi ua matou foaiina atu ai ia te oe”* INofo29. Na saunoa le afioga Taitaifono Fono Tele e faafetaia le susuga faafeagaiga ma le paia o le Ekalesia i Fasitootai mo le soifua galulue, o le faailoga o le alolofa i le Atua, ma le alofa i le tagata ese. Sa faaleo foi le faafetai a le EFKS i le Pulega ma le Matagaluega mo faiga taulaga o le Tala Lelei talu ai. O lana faamanatu, ia faia pea le galuega a le Atua i ala a le Atua e ana le galuega. Ona ia tauaao lea o le meaalofa masani a le Ekalesia Aoao e \$10,000, ma taualuga ai lana faafetai i le fetalaga a le Alii, *“³⁰a o e faasili ia te a’u, ou te faasili ia te i latou.”* I.Samu.2.

Sa tauaaoina atu Ki o le maota e le Matuaofaiva ma taliaina mai e le Faafeagaiga, ma ooti ai le lipine e le afioga i le Faletua o le Taitaifono Fono Tele e tatala ai le maota. Na silasila maimoa molimau le mamalu o le aofia i totonusi o le maota o le faifeau ma le faletua, ma silafia ai le lima lelei ma le aao sosolo mae’ae’ a o le Matuaofaiva ma le Falefa o lo latou aiga. Ia viia lava le Atua i le fa’aaogaina o taleni mo Lana galuega. Ona mapu ane lea i fa’aalaoaloga masani faale EFKS, o pelega o le galuega a le Atua. O le susuga Eric Mulitalo FS ma Amata na i’u mai Malua i le tausaga 2010, ma galue ai i le Malua Printing & Bookshop i le 2011-2012. Na valaauina ma amata galulue i le EFKS Fasitootai ia Fepuari 2013, ina ua malolo penisione le susuga toeaina Lale Ieremia FT i le 2012 (le tausaga sa avea ai ma Taitaifono o le Fono Tele) *“Aua nei ia te i matou, le Alii e...a ia tuuina atu le viiga i lou suafa.”*

F.Sulu

AUE! UA MALIU LE TOA.

(Siaosi Leleimalefaga FS)

8/9/1950-5/11/2020(70+1+29)

“⁷Amuia le tagata o lē faatuatua i le Alii, o lē ua fai le Alii mona faatuatua. ⁸Auā o ia e faapei o le laau ua totō i tafatafa ane o le vai, ua sosolo atu ona a'a i tafatafa ane o le vaitafe..” Iere.17.

O le masina o Me 2020 na malolo penisione mai ai le susuga i le faafeagaiga ia Siaosi Leleimalefaga FS ma le faletua ia Pelelini mai le EFKS Vailoa Palauli (Sulu Samoa Me 2020). Na malolo mai i lona aiga i Vaivase-uta, ma valaauna ai e lona Matai i le aso 5 Novema 2020. O lona sauniga faaleaiga na faia i le Aso Faraile 13/11 i lona maota i Vaivase-uta, na taitai e le susuga Siaosi Moananu FS (Tafitoala). O se sauniga na faatumulia i ona aiga faapea aiga o le faletua o Pelelini, o Toeaina, Faifeau ma faletua o lupe faalele a aiganalua, faapea lana Ekalesia i Vailoa Palauli na malaga mamao mai na latou taualuga le mafutaga i le pese masani a le Faifaiaso na fiafia uma ai ae maise le tina ia Pelelini. O lona toe sauniga na faia i le aso 14/11 i le malumalu o la latou Ekalesia EFKS Apia-uta, na taitai e le susuga Siolo Tauati FT (KMTAApia). Na auai le Taitaifono Fono Tele ma le mamalu o Toeaina, Toeaina/Faifeau Penisione, le Pulega Apia Sasa'e, Faipule o le Palemene ma le paia i aiga na lua.

O le susuga Moli Moli FS (Matautu-tai) na momoli atu le tino maliu ma faitau le Tusi Paia (Iere.17:5-10). O le susuga Dr. Paulo Koria FS (Faatoia) na saunia Tatalo, a o Tu'uuu KF Tu'uuu FS (Vaipuna) na saunia le Lauga. O i latou na molimau: (i) Reima Penitala Kolose, o le ulumatua a Siaosi ma Pele, o le faletua o le Aoao Malua na i'u mai le tausaga talu ai 2019; o loo tagi mai ala i Niu Sila, na molimau mai luga o upega tafailagi. (ii) Tupa'i Leleimalefaga Togailupe Sapani Leleimalefaga - o le uso na fai ma sui o aiga. “*Ia gase Toa, ae ola Pule*” le upu na ia faamatala ai le soifua o le susuga i le faifeau. (iii) O le susuga i le Toeaina Leaso Tupai FT (Gautavai, KMTA Faasaleleaga) na molimau e tusa o le latou mafutaga ma Siaosi ma Pele, a o la'ua galulue i Vailoa Palauli. “*Le Alii e, e te tuuina atu nei lau auauna ia alu ma le manuia...*” Na ia ta'ua Siaosi o le tagata o le galuega, o le aganuu, o le agafesootai ma soo se tulaga, ua tusa ma lana gagana ua laulioa ai, o le *peripheral*. (iv) Letaulau Pesaleli FS (Nuu-fou) e fai ma sui o le EFKS Vailoa Palauli. Sa latou osi

feagaiga i le aso 3/9/1998, ina ua tuua e Utufua & Taioaopo Naseri le galuega. O Siaosi na toe lalagaina le soifua faitaulaga o le EFKS Vailoa ma toe faafoi i le tulaga maualuga sa i ai i aso o le susuga Tuuau Sao FT ma Sina. (v) Faletua Pelelini S. Leleimalefaga “¹⁰auā pe a ou vaivai, ona ou malosi ai lea.” 2Kori.12. Na ia molimau ma le fiafia ma faafetai i le Atua mo se tamā e alofa faamaoni i le Atua ma Lana galuega, faapea ia te ia ma le fanau, i ona aiga, o uo, le aufaigaluega ma soo se tasi e lē faailogaina se tagata. O se faifeau e saunia lelei ma tapena mae'a mo le galuega i soo se itu. (vi) Siolo Tauati FT. “*Auā ua lē foa 'iina mai e le Atua ia te i tatou le agaga e mata'u ai, a o le agaga e faamalosi ai, ma alofa ai, ma pulea ai o tatou loto.*” 2 Timo 1. O Siaosi o se soo faatuatua o Keriso, o se auauna ma le faigaluega, ua atagia ai le mau a le aposetolo i le tagata ua foa'i i ai e le Atua le agaga e faamalosi, alofa ma pulea ai lona soifua; o le la'au sa totō ma ola a'e i tafatafa ane o le vai, ua sosolo atu ona a'a i tafatafa o le vaitafe. Tala'aga o lona soifua:

Tamā: Leleimalefaga Naama Leleimalefaga (Salesatele). Tina: Pologa Moananu (Falefa).

24/1/1976 - Faaipoipo ia Pelelini Vaaetasi Solomua (Mataututai Apia, Sapapalii), e Malele Pitoitua FT i Faatoia. E to'a 5 uso, 6 tuafafine, 8 le fanau, 29 e na tutupu mai ai, ma le toatele o fanau-fai na nonofo ai ma fa'ao'oga, i Utualii ma Vailoa Palauli.

A'oga: Tulagalua Salesatele, Itumalo Poutasi, Kolisi Samoa, Kolisi Leulumoega Fou.

1969-1972 avea ma alii Malu o le Malo.

1973- 1976 A'otauina Kolisi Faafaifeau Malua.

1976 Sili Aoao Su'ega Faai'uaso (Dux)

1977-1992 Tausinuu EFKS Utualii, MALUA.

1980-1982 Komiti Tupe Matagaluega Malua

1981 Usufono EFKS, Fono Ekalesia Pasefika PCC

1983 Maua lona faailoga BA

1985-1987 Komiti Feau Eseese Matagaluega Malua

1990-1992 Komiti Atina'e Matagaluega Malua

1990 Usufono EFKS i le FGFL sa fai i Niu Sila

1991 Taitaifono, Komiti Atina'e

1992-1998 Pulea'oga, Kolisi Leulumoega Fou

1998-2020 Faifeau Tausinuu, EFKS Vailoa Palauli

44 tausaga-matati'a o le soifua tautua i le EFKS.

O le susuga lava i le toeaina ia Siolo Tauati FT na ta'ita'i le sauniga faai'u na tuuina ifo ai lona tino maliu i le tuugamau, ma faamavae atu ai i le Pese 298 ‘Talofa uso e, tofaina oe. Tofa, tofa, tofa’. FS

TATALA LE FEAGAIGA EFKS SALEILUA

O le susuga Iakopo Pese FS ma le faletua ia Seutatia na tatala le latou feagaiga ma le EFKS Saleilua, Matagaluega Falealili Safata Siumu, i le Aso Toonai 14 Novema 2020. O le susuga i le Toeaina o le Pulega Falealili, Tunumoso Iosia FT (Taitaifono Fono Tele) na taitai ma faatino le sauniga na auai le nuu, le Pulega faapea le mamalu o aiganalua o le faifeau ma lona faletua. Ua mafua lenei aso, ona o se faatofalaiga lea a le Eklesia i Saleilua, na faaleo e le susuga i le A'oa'o Fesoasoani, le tofa ia Touli Toaselau AF na fai ma fofoga o le Eklesia. O le mau, ua afaina tele le galuega ona o le tu'ua so'o mo se taimi umi e le faifeau ma lona faletua, talu sailiga togafiti o la'ua gasegase; ae maise o le leai o ni fesootaiga ma le Eklesia i ia taimi. Sa faao muamua e le A'oa'o Fesoasoani lenei mataupu i le Toeaina, ona ave lea le avanoa ina ia mata'itū le gasologa o le galuega pe faaleleia ia faaletonu, ia toe liuliu foi le tofa pe toe suia se finagalo o le Eklesia. Peita'i ua leai, ua lē ma'alofia lava le uia o le tulaga faanoanoa e pei ona faatino i lea aso, ona o mafuaaga ua ta'ua. Sa saunoa le susuga faafeagaiga ia Iakopo e tali fuitau, na faailoa lo la'ua malilie e taliaina ma le loto maulalo le faatofalaiga ua a'e i le Eklesia; ia tofa malilie foi i le laasaga ua oo i ai la la'ua auaunaga, ona o aafiaga o lo la'ua maloloina i le tino - le vaa ma le ipu o le galuega. E na o le susuga Iakopo sa mafai ona auai i le tatalaina o le feagaiga, ina ua uma le 14 aso faanofoesea talu ona malaga mai Niu Sila. O le faletua ia Seutatia o loo taofia pea i Niu Sila, e faatali ai le taotoga o lona gasegase i se aso aulia i le alofa o le Atua. O le itu e sili ona taua nei, ia tau fai maua le loto fefaaamagaloa'i, ma ia a'oa'o mai vaivaiga o le taimi nei, e faaleleia atili ai le soifua auauna mo le Alii i le lumana'i. Ia maua pea le filemu, a o i ai le atunu i aso faigata o faama'i otu, faapea le aga atu i le faai'uga o lenei tausaga, i aso fiafia o le Kerisimasi ma le Tausaga Fou.

O le susuga Iakopo Pese o lona afioaga o Uafato Fagaloa ma Faleula; o Seutatia e mai Vailima. Na latou osi feagaiga i le tausaga 2010, ina ua maliu le susuga Lualua Meni Tanielu FS. Ia alofa le Atua faamalolo lana auauna ma le faletua i gasegase o faataotolia ai; ia tausia foi i ona aao agalelei le galuega fa'aauau a le EFKS Saleilua. Ia vave le aso e filifili ai se leoleo mamoe na te tausia le galuega, auā e lē moe le fili i lona fia faatā'ape'ape (1Pete.5:8) F.S.

FETU'UTU'UNA'I MUNIAO (Lauga i le Samaga o le Tatau)

Kenese 17:11 "Tou te peritomeina foi pa'u o outou tino, e fai ai ma fa'ailoga o la tatou feagaiga ma outou"

Tasi lenei aganu'u a Isaraelu mai anamua. E valu loa aso talu ona fanau mai se tama tane, ona peritome loa lea. O se aganu'u na fai ma fa'ailoga, o le feagaiga a le Atua ma Apera'amo. O le feagaiga o le ā? O le feagaiga na tautō ai le Atua i Lana auauna o Apera'amo, o le a na matuā fa'ato'ateleina lana fanau. Le toeaina na toetoe lava a alu i le tu'ugamau e leai se atali'i, lea ua folafola i ai le Atua, o le a fai o ia ma tupuga o nu'u e tele. *"Ou te matuā fa'auluolaina oe, ou te faia oe ma tupuga o nu'u, e tupuga mai foi ia te oe o tupu."* Kene.17. O le feagaiga lea na fai ma fa'ailoga e tau'ave pea e fa'avavau. Le peritomeina o tama tane uma o Isaraelu. (O le feagaiga lea, na suia ai Aperamo, O le tamā sili, ia Apera'amo, o le tamā o le vao nu'u.) O lona uiga o le peritomeina o tama tane uma o Isaraelu e ta'i valu aso agai i luga le matutua, o lo'o aumai ai ni mea tāua se lua: 1. Ia tulaga ese ai Isaraelu, mai isi nu'u fa'apaupau (Filisitia); 2. O lo'o afifi mai ai le feso'otaiga a le tama tane Isaraelu, ma lona aiga, o lona atunu'u, ma lana aganu'u, aemaise o lona va tapuia ma lona Atua. O lona uiga, so'o se aganu'u lava, e tatau lava ona i ai sona feso'otaiga ma le agaifanua, o tapuafanua, le aiga, le nu'u, aemaise le tapuaiga i le Atua. O le uiga lea o le manatu, o le Malofie ma le tatau a le tama tane ma le tamaitai Samoa, o le la'e'i fa'a-Samoa o lo'o fa'amatala mai ai mea e lua: 1. O le tatau ma le malu, e ta'u mai ai le tulaga ese (identity) o le tamaitai ma le tama tane Samoa, mai isi atunu'u o le lalolagi. 2. O mamanu o le tatau a le tama tane Samoa, o lo'o fa'amatala mai ai, le feso'otaiga ma lana aganu'u, agaifanua, o lana tautua i ona aiga, o ona faiā ma ona faiva, aemaise o lana tapuaiga i lona Atua.

Uiga o mamanu o le tatau a le tama tane Samoa:

- (i) Va'a taumualua: Fa'amanatu ai le va'a taumualua a Taemā ma Tilafaiga lea na aumai ai le 'ato au mai Fiti. O le feau mo le tama tane, ia iloa ta le va'a, ia to'aga e fa'aa'e le tai, ma to'aga e fagota.
- (ii) Pulutama (lalo o le va'a i tua): o lona uiga, ia iloa e le tama tane Samoa ona aiga, ona fanua o ona gafa, ma ona faiā, ma ia tinoū e puipui ana mea totino.

(Silasila itulau II)

O A TATOU MEA'AI E TATAU MA LE ASO

29 Novema – 5 Tesema 2020

Vala'au ma le Tau Musumusu a le Pu:
Fesagaiga ma le Paia i le ETIVENI – 1
VALA'AUALE PU.

Aso Sa, 29 Novema 2020 (Aso Sa o le Afio Mai).

Mauga Paia o le Atua.

Faitau Esoto 19: 10-25

“¹⁹O le leo o le pu ua alualu ona tele lava; ua tautala atu Mose, ona talia mai lea e le Atua ia te ia i le siufofoga.”

O faiatauga o lenei vaiaso e faatāuaina ai le valaaau o pu mai le Tusi Paia. O le a tatou va’ava’ai pe faapefea ona faailoa mai e pu o mea tetele e tutupu, faaleo le valaaau o taua, valaaau le nuu o le Atua ina ia tapua’i, lapata’i le faauli mai o mala, ma faalauiola le Afio Faalua mai o Keriso, le Faamasinoga Mulimuli ma le pule atoatoa o le Malo o le Atua. I le faiatauga o lenei Aso Sa, o loo fetalai le Alii ia Mose ina ia faapaia le nuu a o latou faalatalata atu i Lona mauga paia. O le valaaau a pu i inei o loo faatonuina le nuu, ma faailoa mai pe a talanoa Mose ma le Atua. O le alualu tele lava o pu mai le lagi e taufaafefe lona leoleoā, ma le auai mai o le Atua o loo tauto’aluaina mai e le natura o le lalolagi i lo latou malosi e gata ai: o le asu, le faiitili ma le uila. O le malosi silisili ese ma le mamalu atoatoa o le Atua ua faailoa. Ua tu Mose i se tulaga uiga ese pei o se auala laupapa i le va o le nuu ma le Atua, o loo fesoota’i i itu uma e lua, ma tau taofiofi i tuaoi ina ia saogalemu le nuu. O se mea lelei le faamanatu mai o le malosi silisili ese o le Atua, faapea le tatau ai ona tatou fa’aalalo ma matata’u i ai. Peitai a o tatou ulufale mai i le tau o le Afio Mai, o loo tatou vaavaai atu foi i le Atua ua afio mai ia te i tatou e ala ia Iesu, o le tagata a’ia’i e vaivai, ma e faigofie ona fesoottai i ai. Ua afio mai e faafeiloa’i i tatou i le tulaga o loo tatou i ai, ina ia oo i ona aso e tatau ai, ona tatou o a’e lea i luga e faatasi ma le Keriso toetu i lona mamalu.

†Le Alii e, ia ou lagona lau valaaau mai i le pu ina ia galue, molimau ma tapua’i i lau Afio i lenei tau o le Afio Mai. Amene.

Aso Gafua, 30 Novema 2020

Iupeli!

Faitau Levitiko 25:1 – 15

“⁹Ia outou ili ai le pu i lo outou nuu uma lava ...

¹⁰E fai lea ma iupeli ia te outou..”

O le valaaau a le pu i lenei aso, o loo ili i le seu o le mamoe po’ a i le Aso o le Togiola, o loo faalauiola ai le amataga o le Tausaga o le Iupeli mo Israelu. O tausaga lona fitu uma e avea ma sapati, o le tausaga e malolo ai le eleele ina ua leai ni laau e totōina ai, ma le eleele ua faalaolao ia toe faatumauina lona lelei. Pe a mavae tausaga faa-sapati e fitu, po o le uma ai o le tausaga lona fasefulumaleiva (49), ona aulia lea o le Tausaga o le Iupeli: o le sapati sili, po o le supasapati. I le tausaga lea (lona 50), e lē gata ina faamalolo le lauelele, ae o mea totino uma e toe faafoi i lona matai e ona, e soloia uma aitalafu, e faasaoloto uma pologa ma toe faafoi i o latou aiga. O le Iupeli o le tausaga paia, ua vavae ese ina ia toe faafoi mea uma i o latou ulua’i tulaga na i ai – ina ia amana’iaina ai o mea uma e mai le Alii ma o Ia e ana. O se tausaga ua faailogaina mo le olaga faigofie ma le saolotoga.

Ina ua tula’i Iesu ma saunoa i le malumalu i le Luka 4:18-21, na Ia sii le mau mai ia Isaia 61, na folafolaina ai le Agaga o le Atua ua i ona luga: ‘e tala’i le tausaga e finagalo malie mai ai le Alii’. O loo ta’ufaatasi e Iesu lona auai mai, o se vaega o le Iupeli a le Atua – o le amataga o se faasaolotoga e faavavau ma le toe faaleleia atoatoa o le lalolagi uma, ina ua oo mai le Malo o le Atua. Mata e ese se tulaga e oo i ai lo tatou lalolagi pe ana tatou fa’aaaua pe a le faiga o tausaga Iupeli: ina ua matuā tuuina atu o tatou tagata e toe faaleleia le telē o le lē paleni i le va o le mau’oa ma le mativa. O le auai o Iesu i o tatou olaga, e tutupu ai se Iupeli fa’aaaua na te faamalosia i tatou e galulue mo le amiontonu, o le alofa ma le filemu mo tagata uma. O ai nisi poo a ni mea e mafai ona e faasaoloto i lenei Ateveni/Afio Mai?

†Le Alii e, o mea uma ua ou maua ma lo’u nei tagata atoa, o ou lava ia. Ia ou agalelei i lou tamaoaiga taumasuasua, ma ia ou naunau e galue mo le amiontonu, o le alofa ma le filemu. Amene.

Mo Mafaufauga Atili: Su’esu’ e ma a’oa’o atili i taumafaiga faa-kelope mo le amiontonu o aitalafu, e ala i le sailiili i galuega a nisi faalapotopotoga fesoasoani e pei o le Jubilee Debt Campaign po o le Tearfund.

Se taalili mautinoia!

Faitau Iosua 6:1-7, 15-21

“*Ina ave ia le atolaau o le feagaiga, ma ia ave e faiataulaga e toafitu o pu e fitu o le iupeli, i luma o le atolaau a le Alii.*”

A o ulufale atu Iosua ma le fanauga a Israuelu i totonu o le Nuu Folafolaina, o le ulua’i faafitauli na latou fetaia’i o le pa o le aai o Ieriko. Ua fetalai le Atua ua na tuuina atu le aai i o latou lima; pau le mea e fai e Israuelu o le mulimuli i faatonuga a le Atua ona latou manumalo lea. Peitai, o metotia a le Atua e foliga valea! E aofia ai le savavali faataamilo i le aai o fitafita, o faiataulaga ma pu e mulimuli atu i le Atolaau o le Feagaiga mo aso e ono. O lona fitu o aso latou te savavali faataamilo ai e faafit, a o ili e faiataulaga o pu. Pe a ili faaloaloa le pu, ona alalaga lea o tagata uma ma solo ai i lalo le pa o Ieriko. O le mea tonu lea na fai e Israuelu, ma na manuia le fuafuaga. Na o Raava le fafine talitane na faasaoina mai le nuu o Ieriko. O ia o se tagata lē talafeagai e filifilia mo se faaeaina, peitai na avea ma se tasi iloga i le tala faasolopito o le faaolataga i lona lavea ai i le gafa e tupuga mai ai Iesu (*Mata. 1:5*). O loo i ai nisi o mataupu tāua iinei mo lo tatou avea ma soo Kerisiano. Muamua, o loo faalauiloa ma le mautinoia e Israuelu le i ai o le Atua faatasi ma i latou ma Lona auai i la latou gaioiga, e pei ona iloa i le fe’avea’iina o le Atolaau o le Feagaiga. O lona lua, o le usita’i o Iosua ma le nuu i le faatonuga a le Atua, e ui ina foliga lē fetaui i le mafaufau ma leai sona aogā tele i le manatu o le tagata. Ua talitonu le nuu o le Atua o loo pulea mea uma ma e tausi e Ia ana folafolaga. Ae sili atu ai, o filifiliga ma tofiga a le Atua e masani ona faate’ia ai le tagata ma e ese mai lava i ona manatu. O le Atua o Ia le siamupini o tagata faatauvaa, i latou e lē taualoa ma lē amana’iaina. E lelei mo i tatou le manatua pea o ala o le Atua e matuā ese mai i o tatou ala, ae afai tatou te talitonu, usiusita’i ma faatuatua i ai, ona tutupu lea o mea ofoofogia!

† *Le Alii e, le Atua fesoasoani mai ina ia ou talitonu i lau Afio ma lou pulea o mea uma, e ui ina ou tauivi e malamalama i ou ala. Amene.*

Mo Mafaufauga Atili: O a ni pa i lou olaga, i lau Ekalesia ma lou nuu, e te fia vaai atu ua solo i lalo e le Agaga Paia, i lenei vaitau o le Ateveni/Afio Mai?

Usita’ia le lapata’iga

Faitau: Ioelu 2:1-16. “*Ia outou ilia le pu i Siona, ia taalili i lo’u mauga paia!*”

O le iliina o pu i le Tusi Paia o loo fa’aaogā i auala eseese. O ananafī na vaia ai le taalili o le pu o se valaau mo le osofaiga i le taua. I le faiatauga o le asō, o loo fa’aaogā muamua o se lapataiga, ona avea lea o se valaau e tapua’i ai. O le pu muamua a Ioelu o loo faailoa mai ai ua latalata mai puapuagā. O se mala o sē o loo aga’i mai ma e pei o se vaega’au e osofa’i. O loo faamatala e Ioelu le faafanoga i le gagana faa-apokalita (faa-valoaga ma le i’uga o le lalolagi): o le Aso o le Alii ua lata mai. O faalavelave mata’utia i le Feagaiga Tuai, faa-si’osi’omaga ma le faa-fitafita, e masani ona faaupuina faaperofeta o se ulua’i tofo lea i le Aso o le Faamasinoga. E aafia le lalolagi atoa, e ala i mafui’e ma le pogisa. O le malamalama ma le ola e faaumatia. Peita’i e lē māumāuina mea uma. O loo valaau Ioelu ina ia salamō, i lona talitonuga e mafai ona lavea’iina puapuaga pe afai e toe liliu tagata i le Atua. O lona lua o pu i le faiatauga o le asō, o le valaau e tapua’i ai. Sa ili pu i le tele o sauniga tetele faalelotu, e pei o le Tausamiga o le Masina Faato’ a Vaaia (*Salamo 81:3*). Mo Ioelu, o le ili o le pu o le valaau mo le anapogi paia e faailoga ai le toe liliu i le Alii, o Lē alofa ma agalelei i Lona nuu auā o le Atua, ‘¹³*e alofa fua, ma alofa mutimutivale o ia, e tele gese lona to’asa, ua tumu foi lona alofa..*’ O a ni faalavelave o tatou fetaia’i nei aso? O mana’omia lo tatou faaleo o le valaau ina ia ala mai ai nisi tagata i le puapuaga ua lata mai? O tatou i ai i se tulaga mata’utia o loo savavali aga’i atu i puapuaga ogaoga faale-siosiomaga, faa-upufai o malo, pe faa-agafesootai? I le avea ai o tatou ma Kerisiano, ia tatou usitai i le valaau o le pu lona lua a Ioelu i lenei tau o le Ateveni, ma potopoto faatasi e liliu i le Alii, a o tatou sauni e lē gata e faailoga le Atua ua ia te i tatou e ala i le afio mai o Iesu Keriso, ae faapea foi le nofo sagisagi e faatali Lona Toe Afio Faalua mai.

† *Le Alii e, le Atua fesoasoani mai ina ia ou faamuamua lau Afio i mea uma. Ia faapupula o’u mata ia ou iloa atu ai puapuagā o loo fotua’i mai i lo matou paneta, ma aumai ia te a’u le loto tele e faaleo atu ai Lau lapataiga. Amene.*

Mo Mafaufauga Atili: I lenei tau o le Ateveni, ia fai se faatatau e faavasega se taimi faapitoa e ‘anapogi’ ai. Ia fa’aaogā le taimi e liliu ai i le Atua i le tatalo.

MEA'AI E TATAU MA LE ASO

Aso Tofi, 3 Tesema 2020.

Tula'i uma!

Faitau: I Korinito 15:51-58

“⁵²*Auā e ilia lava (le pu), e toe tutū mai ai e ua oti ma le ola pea, e liua foi i tatou.*”

O lo'u atalii o se faatino ata ma tala, ma se fai musika faapolōfesa: na a'oga i le iliga o le pu i se a'oga musika. I totonu o le faaputuga o musika lauiloa ma pese ta'uta'ua e ili i le pu, o loo i ai ni solo na tusia e Handel i le pese, *O le a Ilia le Pu* mai lana koneseti logologoā e ta'ua o le Messiah: e lē uma le nene'e fia faalogo i le atalii o faata'ita'i pe faatino le iliina o nei solo. O le solo e aga'i atu i le faai'uga o le pese umi, ma e tatau i le ili pu ona mataala ina ia ili le pu e faailoa le toetu. Na faavae e Handel ulua'i pā'ō o le leo o le pu, i luga o le faailo sa masani ona fa'aaogā i faamasinoga i Egelani i le sefulufitu senituri, pe a ulufale mai le faamasino ae valaau loa le ofisa, 'Tula'i tagata uma'. Na iloa e Handel o le a malamalamā ma maitauina e le 'au maimoa i ana koneseti le faailo masani lea, ma faafesoota'i atu i le Aso o le Faamasinoga. O loo tusi atu le apostolo o Paulo i le au Kerisiano i Korinito e faasino i le mea lilo o le Aso o le Alii e faailoa mai e le ili o le pu. O e ua oti o le a toe faatuina, ma e liua mea uma pei o le 'emo o le mata, i fafo faapea foi ma totonu. O tatou tino o le a lē toe afaina i le oti ma le pala, ae o le a avea ma vaega o le foafoaga fou a le Atua. I Lona toe tu mai le oti, ua faatoilaloia ai e Iesu Keriso le oti i lona manumalo ma tatalaina ai le avanoa mo tagata uma ina ia faasa'olotoina i le mamalu. I Lona foafoaga sa mataala ma taulamua ai le Atua i le faatoilaloia o le gaogao ma le soona nunumi, ma o loo tatou faatalitali i le aso e liliuina ma faafouina ai tagata ma mea uma. O lo tatou faamoemoe lea i le lumana'i, ma e na te mamanuina foi lo tatou olaga o le taimi nei. Ua faatonu mai e Paulo ina ia tatou tutumau i lo tatou faatuatua; e leai se mea tatou te faia i le suafa o le Alii mo le Alii e maumau.

† *Faafetai le Alii e, ua e tatalaina mo i matou le ala i le ola faavavau. Fesoasoani mai ia matou taofi mau i lenei faamoemoe o le lumana'i, i se auala e mamanuina ai a matou gaioiga ma faai'uga o aso taitasi. Amene.*

Mo Mafaufauga Atili: Taumafai e faalogologo i le pese a Handel, *O le a Ilia le Pu (The Trumpet Shall Sound)*. E mafai ona e lagonaina le faamoemoe, le mea lilo ma le mamana o le Aso o le Alii?

Aso Faraile, 4 Tesema 2020.

Faatasi ma Keriso ma Ola ia Keriso

Faitau: I Tesalonia 4:13-18

“¹⁶*Auā e afio ifo mai le lagi le Alii lava, ma le alaga, ma le leo o le agelu sili, ma le pu a le Atua. E muamua foi ona toe tutū mai o e ua oti o ia Keriso.*”

I le faitauga o ananafi, sa manatu mamafa ai le au Korinito pe se ā o le a tupu i tagata o loo ola pe a oo mai le Aso o le Alii. E tuufaafeagai lena ma le au Tesalonia, o loo fia maua se tala mai ia Paulo, pe faapefea i latou ua maliliu i le toe afio mai o le Alii. Ua ta'u atu i ai e Paulo le tali mautū. Ia latou nofo mautinoa, o i latou ua maliliu e muamua ona toe tutū mai le oti faatasi ma Keriso i Lona toe afio mai. E feiloa'i faatasi i latou uma ma Keriso ma nonofo faatasi ma Ia e faavavau. O se faamafanafanaga faalototele sili lenei mo le au Kerisiano i Tesalonia, a o latou fetaia'i ma puapuagā ma sauaga ona o lo latou faatuatua ia Iesu. O loo fa'aaogā e Paulo ni ata faatusa malolosi mai tusitusiga faa-apokalitia o le Feagaiga Tuai – ae maise le Tusi o Tanielu – e faamatala ai le Afio Faalua mai o Keriso, ma e aofia ai le fetagisi, o le alalaga ma tauvalaauga ma le iliga o pu; o se tulaga e malomaloā tele! O nisi Kerisiano latou te faitauina nei faamatalaga o le 'Siitiaga' e tusa ma ona mata'itisi, o nisi e vaai i ai o se valivaliga o upu ma tala – o le faamatalaina auiliili o mafaufauga e leai se tasi ua iloa tino pe vaai tino i ai. O le mea e aupito sili ona tāua, o le Alii o le a toe afio mai ma e ao ona tatou faatalitali i lena aso ma le naunauta'i. O le tau o le Ateveni/Afio Mai, e faamalosia ai i tatou e taofi mau le liutino tagata o le Atua e ala ia Iesu i Peteleema, faatasi ma le faamoemoe i le Toe Afio Faalua Mai o Iesu. O e maitauina le faamalosi'au atu o Paulo i le au Tesalonia, ina ia 'aua le faanoanoa ona o e ua maliliu e pei ona faia e tagata faapaupau? E lē o fai atu Paulo e sesē le tagi pe faanoanoa, e leai; o le natura masani o le tagata e tatau ona lagona le tiga ma le faanoanoa pe a maliliu e pele i le mafutaga faaletagata. Peitai, o lo tatou faanoanoa e tatau ona faia i totonu o le si'osi'omaga o lo tatou faamoemoe faa-Kerisiano: o le silafia mautinoa lea e i ai le aso tatou te toe feiloa'i ma mafuta faatasi ai i le atoatoa ma i latou ua muamua atu, i le faavavau o le Atua.

† *Le Alii e, Iesu faafetai mo lou toe tu manumalo. E i ai le aso tatou te toe feiloa'i ma mafuta ai ma lau Afio faapea ma i latou uma e pele ia i matou ae ua lē toe vaai atu i ai. Ia matou taofi mau pea i lenei faamoemoe. Amene.*

FETU'UTU'UNA'I MUNIAO (*mai le 7*)

(iii) ‘Asofa’aifo: ‘Aso o lo’o i luma o le puimanava. O le tama tane, e tatau ona tautua lelei i le aiga, ia fiafia ma loto fesoasoani i so’o se tagata.

(iv) ‘Aso Tali-itu: E i tua o le soga’imiti. Ia iloa e le tama tane o ia ole malosi o lona aiga. E mau, auā e to’aga e galue i faiva o le vao ma faiva o le sami.

(v) Fa’aatualoa tasi: Fa’amanatu mai ai i le tama tane Samoa, lo la va ma lana feagaiga o lona tuafafine, ia matuā malu puipuia.

(vi) Pe’ā: (tama sa) O le uiga lea o le igoa o le Pe’ā – o le tama ua fa’asaina.

(vii) Fa’avae’ali: tasi lea tiute o le tama Samoa, o le taina lea o ‘ali (lalago), e aluluga ai matai ma malo fegasoloa’i i aso anamua.

(viii) Fa’amatāupega: (a) E lē soli aiga (o lona uiga e lē mata’ifale, e iloa le va tapuia ma tamaitai o lona aiga); (e) Ia poto e lalaga upega seulupe ma upega fagota.

(ix) Pute (alo): O le tama tane Samoa, ma lana tautua e ola ma oti i le puipuiga o lona aiga.

O lona uiga o le tatau (pe’ā) a le tama tane Samoa, o lana tautoga i lana tautua i ona faiva fa’atama tane, o le a ia tauave i lona tino po’o lona pa’u, e ala i le taina o le tatau. O lona uiga afai e tiga le ma’ini o le au a le tufuga, e fa’apena le fa’atinoga o le tautua fa’atama tane Samoa. Ou te talitonu foi, e i ai le feso’otaiga ma lana tapuaiga i le Atua, i lana tautoga ma lana tautua lea. Leaga o vala ia o le tautua a le taule’ale’ā Samoa, o lona aiga, o lona nu’u, ma lana Ekalesia. O le Peritome, na fai ma fa’ailoga o le feagaiga a le Atua ma Apera’amo, lea na suia ai lona igoa. A o le malofie (tatau), o le laei a le tamaitai/tama tane Samoa, e fa’amatala mai ai lana tautua toto mo lona aiga, aemaise lana tautua i le galuega paia a le Atua, lea o le a ia tauaveina i lona tino.

A silasila i le fa’atinoga o le galuega, e leai se ata e fa’ata’atia muamua e fua i ai, o le ata atoa o lo’o i le mafaufau o le tufuga. O lona uiga tasi lenei meaalofa a le Atua mo tagata Samoa. E lē gata o lo’o fa’āali mai ai le tautua tuāvae a le tagata Samoa, ae ua avea foi ma auala e fa’alauiloa ai Samoa i le lalolagi i fafo.

“⁵*A ua manu’ā o ia...o ona faalāvalāva foi ua mālōlō ai tatou.*” Isa 53. O fa’alavalava ma manu’anu’ā o lo tatou Ali’i, na fa’ao’o i ai e lima tētē o le tagata. O Ona tiga ma Ona puapuaga na la tauaveina i Lona tino, o Lana tautoga lea, na la ofo mai ai Lona soifua paia na maliu, ae na toe tu malo ia ola tagata uma. Amene.

*Keneti Leauapepetele FS,
EFKS Savaia & Tafagamanu-uta, AANA.*

O E UA FAI I LAGI...

NATIA MANO-LUNA’I

17/12/1922-13/7/2020 (97+6+27)

Na soifua mai i le aso 17 Tesema 1922, ae maliu filemū i le Aso Gafua 13 Julai 2020, i le 5.30am, ma e 97 tausaga na foa’i e le Atua ia te ia e soifua ma galue ai. O le tina ia Natia, o se tasi lea matafale fa’avae o le Aulotu EFKS Loimata o Apaula, ma e lē itiiti lona sao i le tau atina’eina o lenei galuega mai le amataga. Sa faapa’iaina lona tofi Ti’akono i le Aso 10 Aperila 1985, ma galue ai i le auaunaga faati’akono mo le tele o tausaga. O se tina e matuā talenia i le gaosiga o mea-taulima, ma o ana galuega ia sa tausi ai lona aiga ma fai ai lana tautua i le Ekalesia. E foliga fiafia ma tausaafia, ma o se tina e tumu i le alofa. E valaau nei lona matai, ua tele lava ina nofo fale ona o le tulaga matua o lona soifua, a ua fa’aaau pe a lana tautua e ala i le matāfale a nai ona alo. O le Aso Lua 21 Julai 2020 na faia ai lona sauniga faale’āiga i le itula e 9.00am, ma lona toe sauniga i le itula e 11.00am; na faia uma lava i le malumalu o lana ekalesia e pele i lona agaga, le EFKS Loimata o Apaula i Papauta. O le Susuga i le Faifeau Toeaina o le Pulega Apia Sisifo ia Efu Efu FT (Aai o Niue), o se lupe faalele fo’i a le tina, na ta’ita’iina lona sauniga faaleaiga. O a’u na momolia lona sa i totonu o le malumalu ae le’i amataina lea sauniga, ma taoto ai lava lona sa i le malumalu mo lona toe sauniga. O le toe sauniga na ou ta’ita’iina, faatasi ai ma le lagolagosua a le auuso galulue o le aulotu. O tatalo na saunia e le Susuga i le A’oa’o Fesoasoani ia Tagaloa Aolele Godinet AF, o a’u na faitauina le Tusi Pa’ia ma faia lona molimau faaleagaga; ae o le lauga na saunia e le Susuga i le Faifeau Nofoaiga ia Rev. Aokuso Jr. Lee. Na faai’u ona sauniga i lona oliolisaga tumau i lona maota lava i Papauta, ma faatofā atu ai i lenei auauna aogā. Tau ia ina ia faasilisiliina le viiga o le Atua i lona soifua galue, ma ia saga faamaiseina si fanau ma aiga faapea fo’i lenei ekalesia. “¹³*Na ou faalogo fo’i i le leo mai le lagi, ua faapea mai ia te a’u,* “*Ia e tusi: Amuia ē ua oti, o e ua oti o i le Alii e amata i nei ona po.*” “*O lea lava,*” ua fetalai mai ai le Agaga, “*ina ia latou malolo i a latou galuega tiga; auā fo’i o a latou galuega e mulimuli ia te i latou.*” Fa’aa.14. Tofa Soifua Natia, ma ia manuia lau malaga.

Saunia: *Letupu Faauuga Mata’utia FS,
EFKS Loimata o Apaula, APIA.*

O E UA FAI I LAGI LE FOLAUGA

PĀTŪ ATIVALU TOGI II

7/9/1941 - 6/11/2019 (78+2)

Taitai o le Toe Sauniga - Enefatu Lesa FT (Tanoalei'a)
Faauulfale le tino maliu-Faalenuu Tagataese FS (Levili)
TataloSemikueva Faatoafe FS (Moataa)
Faitauina Tusi Paia ...Ionatana Teo FS (Maugafafia)
Lauga.....Petaia Leavai FS (Fagalii)
Molimau Faale-AgagaIese Uele FS
Toe Sauniga i le TuugamauIese Uele FS

O la'u molimau i le soifua faaleagaga o le tamā nei ia Patu Ativalu Togi II, e faavae i upu nei: "Amuia lava lea auauna, e maua mai e lona Matai, o loo faapea ona fai." E ui lava i ona mamalu faaleatunu, o ia o le sa'o o lona aiga, o le sa'o o le nuu, o ia foi o le tumutumu o le itumalo, ae i le galuega a le Atua, o ia lava ua na o se auauna. A humble servant of God. O Patu sa faatiakonoina i le tausaga e 1972; ua tusa nei ma le 47 tausaga o avea ma tiakono i totonu o le EFKS Vaiala. O loo maua i api o le galuega o se tasi o tiakono loto tele ma taulamua i le galuega; aemaise ai le toe fausiaina o galuega o le malumalu tapua'i ma le fale o le faifeau i taimi o le toeaina o Fuatai Tuautu FT. E faapea lona faaleleia pei ona i ai i le taimi nei, a o faifeau ai Lotu & Ane Uele FS. Sa fai ma Komiti Tupe o Taulaga. E taulamua ma lagolago malosi i mea o le lotu ma le galuega. Ua talitonu faamaoni Patu, o lona manuia lea i tafa eseese o le soifua ma le ola. O manuia faavavau o lona Atua. E amata i le soifuaga nei e oo i le ola e faavavau.

Pei o sana mea fafia le sau i le tapuaiga faitele a le nuu i taeao o Aso Sa uma. E le misi, sei vagana lava ua gasegase. E lē pa'ū se mea e fai i totonu o le lotu-Taulaga, Alofa, Atinae. E galue faamaoni. E le misia filifiliga ma aso faale-Eklesia. E lolotu uma lana fanau ma lona aiga. E faamaopoopo i to'ana'i uma lava a tiakono pe a lauga se tofi. E musu e nofonofo mai lona maota ao fai ni mea iinei a le Eklesia. Soo se tofi lava, e afio mai lava e to'ana'i sei vagana ua le maua sona malosi. Taimi uma lava o tofi; e tapena mai lava e Patu se sua e faia mo le tofi tusa lava pe le auai. E faigofie ma tuu sao ana upu ma faamatalaga. E le tau matemateina i se taimi. E le tele ni upu, ae tumu i le alofa e faatino. O le ala foi lea o le to'afifilemu o mea uma, e leai a ma se mea o faaletonu. E pele ma mitamita i tamafanau a le nuu, soo se isi ua fai ma taulaga tagata, o faifeau o le Tala

Lelei pe a'otauina i Malua. E aloalo lelei Patu ma alii sa'o e molimoli ana taulaga tagata i o latou nuu. E aloalo lelei foi e tali pe a foi mai ia latou galuega, pe tuua mai Malua, pe malolo mai foi. E tapena mae'ae'a lana faifeau ma lona nuu i mea e fai o le Pulega. A fai taulaga, e tula'i ma faamalosi'au i le nuu i le soifuga faitaulaga. A fai pese, e saunoa malosi ia lelei ma maopoopo le aufaipese. Ia masi'i a nuu potopoto

Aitalafu - Ma te oo mai o fai le Toomaga e \$50,000 mai le Eklesia . O le toomaga e masani ona totogi i le 3 - 4 tausaga e tusa lea ma le \$1,200 i le masina. Sa mana'o Patu e totogi le \$5,000 i le masina le matou Toomaga, ia vave ona uma. Na faia ia Mati 2017 ae toe uma ia Tesema 2017. E na o le 9 masina na totogi ai le Toomaga ae uma. Fai mai le Ofisa, O se aulotu muamua lenei ua \$5,000 i le masina se toe totogiga, ua le maua ai ma se tului faasili.

Olana tulai mulimuli lava i le Eklesia, o lona finagalo ia lafo uma tagata faigaluega i le Atinae. Po o ai lava le tagata, e faigaluega loa lafo i le atina'e. Tusa lava pe \$3.00 pe \$5.00 ae ia togi sau ma'a. Fai mai Patu, ia 'aua nei lafi le tasi i tua o le isi. E ese ma le taua o lea a'oa'oga. Lea la ua alu ai i le taimi nei a matou Atine - e fai matafale ma le au faigaluega. E pele ia te ia lana faifeau. E tumu i le fa'aaloalo i le va ma le faifeau ma lona toalua. Tusa lava pe ou te laititi mamao, ae ese ma le fa'aaloalo i le Faifeau. E le gata ia Patu Togi II, ae faapea le saofiaga a Alii sa'o o le nuu. E ese ma le tausi faifeau. O le mamalu foi lea o le Galuega i totonu o le nuu nei.

E le misi le suavai a le faifeau i Aso Sa uma. O a ni mea lelei na te maua e faasoa mai. A ou asiati atu, e aloalo lelei mai ma talia lelei le faifeau. E o'o lava i ona taimi mulimuli, e talotalo mai lava ma to'afifilemu. O le auauna ua masani ma tiga, o le auauna ua sauni e feiloa'i ma lona Matai. E le'i afu le soifua o Patu. Ae ua afu lana tautua. Fai mai le Tusi o Teuteronomie, "⁵Ua oti foi Mose le auauna a le Alii.. 'e le'i puaoa ona mata, e le'i mayae foi lona malosi". Ae a? Ua tau le soifua tautua. Sa ta'ita'i le nuu ma tausia i le filemu. E le'i malolo pe nofonofo. Sa galue faatasi ma tiga ma puapuaga o le olaga. E oo mai lava le valaau, o galue a ma tautua. E leai a se fua e amata ai le olaga, e leai foi se fua e pau mai ai . Ao le fa'a-aoga tatau o aso uma o le olaga e viia ai le Atua; O le mamalu ma le faaeaina aupito maualuga a lena. E faatumutumu i ai tiuga ma

O E UA FAI I LAGI LE FOLAUGA

faiva manai a soo se auauna lelei. O la Iesu, *ou te ia te outou faapei o se auauna.* I le soifua galue ma le tautua malo a Patu Ativalu i le galuega a le Atua i le Ekalesia i Vaiala nei, o ia lava o se tasi Tamalii sa poutu toa i ai le galuega. E maua mai Patu Ativalu e lona Matai, o ia ta’imua pea mo le Ekalesia i Vaiala nei. A great leader who always leads. O le tofa sa tiu ai le nuu nei o Vaiala, o le tofa sa faamoemoe i ai le Ekalesia i Vaiala nei, o le tofa foi sa faalagolago tele i ai a’u nei le faifeau. E le’i i ai a se pale na maua e Iesu i le lalolagi. Na o foliga a o le otu. O mea matuitui na fili e le lalolagi ma oomifio i lona ao ma tafe totoi ai lona tino. Peitai ina ua afio i le lagu ua Ia aumai le pale sili mo le tagata. O le pale o le ola. Mo le faletua ia Faga ma le nofo a alo, ‘aua ne’i maumauina a’upega o le taua lea sa tautua ai Patu. ‘Aua foi ne’i maumauina meaalofa o le taua lea sa tau ai lo outou tamā mo aiga, le nuu, le itumalo, ae maise o le Ekalesia. Silasila foi, o lea lava ua maua mai e lona Matai, o loo faapea ona ia fai. Ua sili ‘ofe nei le seuga a le tautai matapalapala, ua faae’e foi le foe i le tau, ua foi i le Atua le agaga o Lana auauna. O le faafetai faa Iesu – “²¹*Ua lelei ia, le auauna lelei e, ma le faamaoni...ina ulufale mai ia i le fiafia o lou Alii” Mata.25.* “⁴⁶*Amuia lea auauna, pe a sau lona Alii e maua o ia o loo faapea ona fai.* ” Mata.24. Soifua.

Saunia: Iese Uele FS, EFKS Vaiala,
APIA SASA’E.

LAAVASA FANUALELEI PILI MAO 15/7/1918 - 6/12/2018 **(100 tausaga, 4 masina, 22 aso o le soifua)**

Taitai o le Toe Sauniga.....Iese Uele (FS)
Faaulufaleina o le tino maliu.....Iupeli Ieremia (FS)
Tatalo.....Fiso Lakisa (AM)
Faitauina Tusi Paia.....Mulitalo Tini (AF)
Lauga & Molimau Faale-Agaga.....Iese Uele (FS)
Toe Sauniga i le TuugamauIese Uele (FS)

Na faatiakono le tina ia Laavasa ma le tamā ia Fanualelei i le Aso 29 Setema 1985 e le Toeaina ia Fuatai Tuautu FT. E mavae atu Fuatai, soso’o mai ma le faifeau o Lotu Uele FS, o lo’o fa’auau pea le

tofi tiakono. Ma te oo mai i le galuega i le tausaga nei 2020, ua le o toe mafai ona oo mai le tina ia Laavasa i le Lotu i Aso Sa pei ona masani ai, ona o le soifua ua matua, se’i vagana Aso Sa faapitoa pei o le Aso Sa o Tina. O loo māua i faamaumauga, o ia o se tina galue; taulamua e faamaopoopo mea e fai a le Ekalesia ma le nuu. E toaga i le lotu. Ma o ia foi o se tasi o tina sa saili i ai le tofa a le Mafutaga a tina a o malosi. E taulamua foi i mea e fai a Faletua ma Tausi. E silafia uma e le nuu, ae le’i tele ni taavale; tasi lenei tina e savali mai lava i Fogavai e agai i le Falesa i le lotu o le taeao ma le lotu o le afiafi. O se tasi lea o mafuaaga ua umi ai lona malosi ma ua atoa ai le 100 tausaga o lona soifua. E aumai lana fanau i le lotu ma le Ekalesia. Sa ou asia i a’u asiasiga faapea taimi e momoli ai le faamanatuga i Aso Sa muamua ma maitauina ai lona malosi. E le iloa sona gasegase; e nofo mai i luga, e aloalo lelei mai e talia le Faamanatuga i Aso Sa ma fai lana tatalo. O le faailoga o le maua’o lona faatuatuaga ma le faatuatu i le Keriso Manumalo.

O le Aso Sa 2 Tesema le ma feiloaiga mulimuli ina ua ma o e momoli le Faamanatuga. Sa malosi, e le’i po foi lana silasila ma sa iloa lelei le faifeau. Sa talia le Faamanatuga ma fai lana tatalo; ma faai’u foi i le tatalo na ou saunia. Fai foi lea o nai tala malie. Ona ma tuumuli mai lea. Aso Tofi ae oo mai le tala, ua amia e le Atua lona soifua. O ia o se tasi o maatulimanu sa faavae ai ma tauaveaina ma faapeleni ma lago lelei ai le fale o lona aiga, le mafutaga a tina, faletua ma tauri faapea foi totonu o le Ekalesia i ona laguna ma lana tofa. Sa taitaina e le Atua seja oo ina Ia faamanavaina lona soifua. *E leai se tufuga na te mafaia ona fausia ni maa taua faapenei e fai ma faavae mo aiga ma le Ekalesia. Ua na o le Atua.* O Laavasa o le ata o galuega mamana a le Atua e faia i le tagata. E fau ina ia mafatotoga le tagata vaivai; e faaeaina ma faatotogina e le Atua i Lona tamaoaiga, faale-mafaufau ma le faale-Agaga, faapea le faaletino. Ia malosi ma anagatā. Ua afu le tautua a le tina. Ua foi atu i lona Matai sa tautua ma faatuatuai a i tausaga e tele.

*O la Iesu, “²⁵*O a’u nei o le toe tu ma le ola; o lē faatuatuai mai ia te a’u, e ui lava ina otu, a e ola lava ia.” Ioa.11.* Ia manuia lau malaga tina.*

Saunia: Iese Uele FS, EFKS Vaiala,
APIA SASA’E

O E UA FAI I LAGI LE FOLAUGA

GU SĀVĀLI TIME

30/7/1947 - 9/5/2020 (72+9+10)

Na faaipoipo ia Lonise Gu Time i le aso 5 Ianuari 1996. O se tasi lenei o toe ulutaia o le ekalesia ma le nuu. Ma te oo mai i le aulotu i le tausaga e 2001, o se tasi lenei o tamā sa i le saofaiga a le au matutua ma ao sinaina o le aulotu sa faatautaia le galuega i lea vaitau. Sa fai lava i latou ma malosi tele i le faifeau i le taeao segisegi o lo ma o'o mai i le galuega. Ua lē maua se faamauga o le taimi tonu na avea ai ma tiakono. Ui i lea ua le ititi tausaga o la laua auaunaga ma le faletua ia Lonise. Na usufono i le Fono Tele i le 2006. E leai se mataupu na talanoaina i le Fono tele na te le'i faamalamalamaina i le aulotu ina ua taliu mai le usugafono i lea tausaga.

Ua loa tausaga o tautua ma auauna i le atunuū e ala i le ofisa o Faiga faiva. Sa fai ma fesoasoani tele lona silafia ma lona tulaga mauluga i lana galuega, aemaise foi le tamaoaiga o ona manatu, i faaiuga fai a le aulotu. O le tulaga foi lea sa faamoemoeina ai o ia ma faaaogaina e le nuu i le tele o mea e fai, aemaise pe a masi'i le nuu i se faiga malaga. E ui ina tele taimi e faimalaga ai le tamā i Fiti ma Niusila ona o lana galuega ma tau lē maua ai se fesootaiga, peitai sa lē taofia ai lana auaunaga ma le tautua e masani ai i le feau o le Tala Lelei. Sa galue malosi ma foa'i lona soifua mo le Alii. Sa fesili ia te ia i taimi e manaomia ai lana fesoasoani i le gasologa o le galuega. Na i ai ni faaletonu i le galuega o le toe faafouina o lo matou falesa i le 2006 ona o ni faafitali na tutupu. O lana faasoa

ma le fautua faatasi ma tamā matutua na mafai ai ona toe faagasolo ma fa'aauauina le galuega seja oo ina mae'a lelei. E loto foa'i ma fiafia e ofo atu mea sili e fa'aalia ai lona alofa i le Atua ma Lana galuega. E faiatalaga ma faamaopoopo i soo se mea e fai a le ekalesia, aemaise lana tausiga ma le foa'i mo le faifeau ma le aiga, i mea na te maua. O taimi na faataotolia ai le tamā ina ua feagai ma lona gasegase, sa tele ai ina ititi taimi matou te fesootai ai, auā e alaala i lo la maota i Tulaele. E asiasi foi i ai i nisi taimi ma maua se feiloaiga ma faasoa mai i lona naunau i nisi o mea ttauā e fia faaleleia o le galuega. Na maua foi se avanoa e asiasi ai i Niu Sila i o la alo ma toe maua ai si ona malosi ma toe taliu mai. Sa matou mafuta ma aufaatasi ma le tamā i tapenaga uma i le taimi na umusaina ai la matou Fale o le Galuega. O le taimi mulimuli lava lea na matou mafuta ai lava o lana toe faasoa lea ma le fautua na saunoa mai ai i le aulotu ina ia faamaoni ma ia faia ia lelei le galuega ina ia maopoopo. Na valaau le Atua ia Gu Time, ao taoto o ia o lo la maota i Tulaele i le aso Toona'i 09/05/2020. O le aso Toona'i 16/05/2020 a'o

feagai ai le atunuū ma vavao ona o le faama'i o le Koviti-19 na molimoli ai i tua lona tino maliu ma faia ai ona toe sauniga i lona maota lava i Saleaaumua. Na matou 'au faatasi ai i lea aso ma le susuga ia Siaosi Matai'a FS, o ia foi na saunia le upu faamafanafana ma ia molimau ai foi e tusa ma la latou mafutaga i Vailoa, Faleata. Na logo i tino molimau a le tina ia Lonise ma le nofo-a-alo, aemaise le molimau matagofie ma malie na saunia e lona uso, le susuga i le toeaina ia Asotasi Time FT, e pei ona talatala ai le soifuaga o le tamā ma meaalofa a le Atua na foa'i ia te ia ma tautua ai mo Lona viiga, e afua mai i totonu o lona aiga, lona nuu ma le ekalesia. Ona fai'u lea i lona molimau na ou saunia, ma matou faamavae atu ai loa i le tamā ina ua mapu atu i lona oliolisaga tumau. Faafetai Gu mo lau maa na togī i le galuega, fai ma viiga o le Atua le soifua aogā. O Gu ma Lonise o se tasi o matafale o le aulotu i EFKS Vailoa, o loo tausia lea e le susuga i le faafeagaiga ia Siaosi Matai'a FS ma le faletua. Ia manuia lau malaga Gu Savali Time.

*Saunia: Pati Vili FS,
EFKS Saleaaumua,
LOTOFAGA LEPA ALEIPATA*

SEPOIMA MOENOÀ

2/11/1948 – 8/9/2019 (70+10+7)

O lona tamā o Lauoletole Malietoa (Matautu, Apia), a o le tina o Faasiusiuosalafai Fanene (Utufaalalafa, Saleaaumua). O le faletua o le tiakono o Tulasunu'i Uene Moenoa. Sa mua'i galulue i la'ua i Amerika Samoa. Sa

tautua ma auauna ai mo le Atua i le EFKAS i Fagatogo e ala i lo la tofi tiakono. Peitai na toe taliu mai ma matou mafuta. Na matou galulue ma fa'aogaina lo la tofi ina ua talia ma faamaonia e le Pulega i le tausaga e 2002. Na

O E UA FAI I LAGI LE FOLAUGA

SESILIA FIAPA'IPA'I TAUILIILI TIUMALU

7/3/1954 - 17/10/2019 (65+2+11)

tuua e le tamā ia Tulasunu'i le mafutaga i le tausaga e 2008 ina ua valaau le Atua ma faamanavaina ana feau, ona fa'aauau mai ai lea o le auaunaga a le tina seia oo ina faamutaina e le Atua i le aso 3 Setema 2019. E toa ono o la alo faatasi ai ma fanau a latou fanau ua tuua e fa'aauau le aiga. O se aiga ausage ma to'agaogao aua o le toatele o ona alo e aumau i atunuu mamao, peitai sa fai ma o latou toomaga si a latou pisinisi (Faleoloa) e tua i ai le soifuaga o aso uma ma faatino ai le auaunaga i le Atua. Sa matauina lona agaga i le galuega. Sa fiafia lava e faatino le auaunaga e ala i le tautua e masani le ekalesia ma lagolago i le galuega i taimi e moomia ai lo latou tau'au i le galuega.. Ua leva ona faataotolia le tina i lona gasegase. Sa le faigofie foi ona toe auai i sauniga ona ua le toe talafeagai lava ma lona malosi. Sa tele foi ina asiiasi mai i ai tamaitai tausima'i ina ua oo lava ina le faigofie le tausiga. Na tu'ua e le tina le mafutaga ina ua faamanavaina e le Atua ana feau i le Aso Lua 3/09/2019 i le itula e 8.00 i le taeao. O le Aso 14 o Setema na faataunuina ai ona toe sauniga i le malumalu i Saleaaumua. Sa auai le aufaigaluega i totolu o lo matou nuu, na faatumulia foi i aiga, o uo ma aumea mamae sa aufaatasai ai i lona aso fiafia. O loo lagomau nei o ia i lona aiga i Saleaaumua lava. Manuia tele lau malaga.

*Saunia: Pati Vili FS
EFKS Saleaaumua
LOTOFAGA LEPA ALEIPATA*

Na ma taunu mai i Saleaaumua i le 2001, o ia o se tasi o tina malosi o le mafutaga. Sa fiafia lava e faamaopoopo i le mafutaga e ala i nafa tausi ma faasinomaga faa-tina auā le atina'eina o la latou pito laau i totolu o le galuega o le Tala Lelei. O se tina foi na feagai ma nisi o gasegase faigata o le tino, e pei ona sa saili matagi ma sii mai atu ai ma lona alii i Niu Sila i le tausaga e 2004. Na alofagia e le Atua ma faamanuaina foi le sailiga, ona toe taliu mai ai lea ma le manuia i aiga, matou toe mafuta ma faauau le galuega e pei ona masani ai. Na tu'ua e le tamā o le aiga ia Tiumalu Amakisi le mafutaga i le tausaga e 2015. Ma o se tina sa molimauina le fiafia e galue auā le fa'aauauina o lo la tofi, e ala i lana faamaopoopo i le tele o faatasiga ma potopotoga e le gata i le Pulega ae faapena foi i le Matagaluega.

O se tasi o tina matua o le mafutaga, sa fai mea faalogo foi ia te ia i latou galuega ma atina'e ma soo se fuafuaga fai. O se tasi foi o le au matutua, o le aulotu o la latou tuualalo, sa fai ma fesoasoani tele i fuafuaga ma tonu fai auā le au i luma o le ekalesia. A'o tapena ma fuafua la matou galuega o le hall, na umusaina i le amataga o le tausaga nei 2020, tasi lenei tina lototole sa naunau ma malosi lana tuualalo ina ia faia loa le galuega. E tautua lotu ma alofa i le Atua e pei ona faaalia i le aao mafola auā le galuega, aemaise le faifeau ma le aiga. Na feagai le tina ma gasegase, sa avea lena ma ala e lē faigofie ai ona toe auai i le tele o mea e fai a le ekalesia. Na faataotolia i le mae'a ai o sauniga o le Aso Sa paepae i le tausaga 2019 ma sii atu i le maota gasegase i Motootua. Na valaau ai lava le Atua i le tina i le Aso 17 Oketopa 2019. O ona toe sauniga na faia lava i

le malumalu EFKS i Saleaaumua i le Aso Faraile 01/11/2019. O le susuga i le toeaina o le pulega Timoteo Momoemausu FT sa ia ta'ita'ia le sauniga. Na matagofie ma malie eseese molimau o le tina, e ala i le fanau ma aiga na lua. Sa faatumulia foi le toe aso o le tina i aiga ma uo aemaise o paolo ma le lasilasi o e na auai e molimau ma aufaatasai ai i lea aso. Faafetai Fiapa'ipa'i mo le tautua, fai lea ma viiga o le Atua.
*Saunia: Pati Vili FS,
EFKS Saleaaumua, LLA*

MASINA O TAULAGA


Sa failoga le Tala Lelei ia Setema E manatua le LMS, 190 lou leva Taulaga Nuu Ese ua tele faasiliga E ui ina faaletonu lou tamaoaiga Malo le ma'au ma lou fai taulaga Afai e uma, o auauna lē aogā lava

Ole Lotu Tamaiti ia Oketopa 122 Koviti19 sa le'i mafai ai ona tu'ua E faigata o fanau o tofi mai le Atua Tele tupe na alu i lea Aso Sa tāua O tupe teu aogā ia, se aso toe fua Palalau mea avea, taeao toe tauia Auā e leai se matāua e lilo ia te Ia

Novema le masina ua iloa faapitoa Ole masina o faiga Taulaga Samoa Velo'aso ai le nofo a Matagaluega E le fou nei lau tautua ua matavela Molimau faamauga i le faasologa Amata i afe, lenei ua faitau miliona

Tele anoanoai tamaoaiga o le Atua E toe tutumu ai gaogao ua faasafua Soo se galuega e fai i le faatuatua E le pine le toe tauia taumasuasua Mapu ane laia e sami le Foa'i Sili Aulia Tesema e foai mai ai le Atalii.

O E UA FAI I LAGI FOLAUGA




PĀTŪ ATIVALU TOGI II



GU SĀVĀLI TIME



SEPOIMA MOENOA



LAAVASA FANUALELEI
PILI MAO



SESILIA FIAPA'IPA'I
TAUILIILI TIUMALU



NATIA MANO-LUNA'I